

那文毅公奏議

那文毅公三任陝甘總督奏議卷六十一目錄

卷六十一

直陳武選弊端

推薦賢能

糾彈庸劣

那文毅公三任陝甘總督奏議卷六十一

男  
容安恭輯

直陳武選弊端

道光三年七月十六日

奏爲兵部題補武職違例舞弊據實叅奏事竊惟六部定例示以常經內外辦理庶務均當恪守成憲不容稍有參差而部務之中文武銓選尤關政體之要平日如能講求臨事再加考覈則書吏無從朦蔽作奸但書吏之能於朦混總因一部則例頭緒紛繁堂司官遷調靡常非比書吏守此不移愈

久愈熟牽混高下覺察甚難

臣 欽聆

仁宗睿皇帝上諭六部辦事堂官不如司官司官不如書吏是部務之假手於書吏久在

聖明洞鑒之中而書吏之敢於舞弊總以部權甚重一經部駁外省無不惟命是從推原其故督撫惟恐結怨部中一事違忤則事事吹毛求疵動多掣肘以致明知部中錯謬亦箝口不敢再言

臣 前任吏部

時題選之例凡題缺歸外選缺歸部遇有外省錯誤必指明所以不合定例原由所駁係選缺卽照例歸部選授係題缺仍令外省另行揀選惟守一

定章程未嘗概由部補嗣又奉

聖明指示將處分別公私定准抵不准抵之例至當  
不易書吏不能操權惟兵部於題推武職案件辦  
理率多弊混臣前年署任僅止三月未能逐細根  
究徹底清釐迨蒙

聖恩簡放陝甘總督將及一年更見兵部議覆陞補官  
職之案准駁任意並不畫一辦理應部題者部題  
應外題者部中亦題若非書吏從中作弊其將補  
缺不應駁而駁不應題而題意欲何爲武弁不明  
事理無論合例與否均先向部中關說而書吏深

知其不明高下在心准駁任意故有武職不在例  
陞官只要錢之謠大權全歸書吏堂司官受其朦  
混武選不可再問查定例應題缺出將預保註冊  
人員由部掣補一缺行令督撫以揀發人員題補  
一缺再於應陞應補人員內題補一缺三缺一輪  
週而復始部中謂之掣補自應將應補人員公同  
掣補不得竟指何人以杜弊混外省斟酌地地相  
宜方名爲題今則部中居然指名題補同一應陞  
人員部中何由知其何人應補何地人地既不相  
宜而應陞應補人員營求賄賂何所不可銓政紊

亂既無可遵循兼恐貽悞地方關係尤重查吏部  
事隸文職大半多係親朋熟識一有不公其人得  
知便可執告武弁不諳文義惟書吏之命是聽卽  
明知事屬違例不敢爭執一經開罪部中此後爲  
日方長自此事事吹求必致降調處分而後已臣  
渥受

皇上逾格天恩謹守

聖訓事事認真不敢少存欺飾今亦誠知部中此後必  
多齟齬但坐視吏胥藐法行私若復緘默狗隱清  
夜捫心何以仰對

君父且若僅止一二事尙不足見兵部舞弊之甚至於如此故忍待將及一年歷將兵部違例之案一一存記今謹擇其尤爲顯著者逐一開列清單恭呈御覽懇請

皇上敕下兵部籤呈定例明白回奏並請

欽派公正大員按例查明覈辦或滑吏稍知懲創而選法可望清釐謹

奏

謹將兵部題補甘省武員違例各案開列清單恭呈



御覽

一定例應題缺出如係有預保省分將預保註冊人員由部掣補一缺後行令該督撫以揀發人員題補一缺後再於應陞應補人員內題補一缺三缺一輪週而復始等因自道光二年九月起至三年六月止共出都司七缺內漢中城守營都司西寧城守營都司均係推缺應由部推又甘肅提標都司雖係題缺應輪用旗員亦聽歸部掣補其餘涼州鎮標後營都司永昌營都司安邊堡都司涇州營都司四題缺自應照例

輪題今一連四缺均由部題補並不按三缺一  
輪之例行令題補揀發及應陞應補之員實屬  
違例從來無此辦法

一定例甘肅平川營堡守備缺出該總督提督揀  
選材技擾長諳練地方之員保題請補等因前  
因平川堡守備缺出臣於道光三年二月初六  
日揀選得奉

旨陞用之會憲營千總白友人地相宜遵例請補今於  
本年六月初二日接准兵部來咨平川堡守備  
員缺以洪水營千總朱永福擬補查白友朱永

福雖同係奉

旨陞用之員而臣題補白友在部掣朱永福之先因何未准白友而題朱永福之處殊不可解若謂朱永福係應陞卽補之員與白友之奉

旨陞用者不同則上年與白友同案保陞之千總王一鳳又業於上年十二月內題准陞授甘肅大靖營守備白友王一鳳同係奉

旨陞用均非卽補而保奏奉

旨及題補守備亦俱在朱永福之前准則均准駁則均駁何以一則准補一則議駁事旣兩歧實屬任

意

一陞署副將劉印景所遺河州鎮標右營遊擊係  
在外揀選題補之缺今准兵部來咨輪缺案內  
應用世職人員該省現無世職仍用預保人員  
本部另行掣補具題等因查寧夏鎮標前營守  
備及土門堡守備二缺臣前以預保千總馬呈  
堦徐國才遵例請補而兵部均以現有西寧軍  
營奉

旨應陞之員所請馬呈堦徐國才題補之處應毋庸議  
既然題推缺出先儘上年西寧軍營出力員弁

擬補則前項遊擊員缺亦應在於西寧軍營案內奉

旨陞用遊擊之都司岳興阿孫榮張作功王元等四員內擬補何以又用預保人員掣補前次又遵何例用預保人員先後實屬互異

一定例陸路題補缺出先儘籍隸他省之員揀選題補如他省之人無可題遊擊都司各缺在在於本籍五百里以外人員題補又定例月選推陞各官如遇本籍寄籍所出之缺俱一體迴避各等因茲出有西寧城守營都司一缺兵部以

河州鎮標左營守備徐福推補查徐福籍隸西  
寧縣原有履歷官冊咨送在部可查今以本籍  
之人卽補本籍之缺旣與定例不符焉得無弊

道光三年八月初二日奉

上諭那彥成奏參兵部題補武職違例舞弊一摺所奏  
甚是著兵部堂官將那彥成單開違例各案先行明  
白回奏並著派托津英和汪廷珍調取兵部題補甘  
省武職稿件秉公查辦據實具奏

道光三年八月初五日奉

旨兵部堂官覆奏題補甘省武職違例各案一摺著交

托津英和汪廷珍按照例案逐款詳查秉公辦理

道光三年八月十八日奉

上諭前據那彥成奏參兵部題補武職違例舞弊各款  
經朕特派托津英和汪廷珍調取該部稿案秉公查  
辦茲據托津等查明該督誤引別省三缺一輪之例  
不知甘省自有專條而以兵部掣補富森布等四員  
爲違例又誤以千總李元魁等都司岳興阿等同爲  
軍營出力人員不知兵部係分別應陞卽補班次遵  
照新例辦理兵部於此二款並無錯誤惟於大靖營  
守備一缺不以卽補之朱永福擬補而隄陝甘總督

所題之王一鳳係屬錯誤又西寧城守營都司一缺  
兵部遵照新例以卽補之徐福擬補徐福籍隸西寧  
例應迴避本內未經聲明揀員對調亦屬疎漏所有  
兵部堂司各官著吏部查取職名分別議處該督雖  
未知專用預保新例惟於本省六缺一輪歷久遵辦  
專條並未詳查輒援他省三缺一輪通例以該部違  
例舞弊指叅亦屬不合那彥成亦著交部議處朱永  
福一案該督是否越次保題著那彥成將接到部文  
月日查明咨部以憑核辦至兵部所引專用預保人  
員之例係乾隆年間歷經通辦何以遲至嘉慶二十



二年始行纂入所有辦例遲延之兵部堂司各官著吏部查取職名議處並著兵部迅將現行新例頒行各省以肅銓政其承辦王一鳳徐福二案之該部書吏違例漏敘是否有意朦混著交刑部訊明具奏

道光三年十月十二日

奏爲遵

旨查出兵部書吏索賄書信實在憑據恭摺覆奏事

臣

查閱營伍甘州途次承准軍機大臣字寄道光三年九月十三日奉

上諭本日據刑部奏審訊承辦王一鳳徐福二案之兵

部書吏俞家鳳據供陝甘總督將王一鳳題補時我  
查出尙有千總朱永福係卽補之員當將原案一併  
回明司官定奪均言應行准補不必議駁我遵諭辦  
稿並不是有心朦混其徐福違例漏敘一案因查例  
內陸路條下並無五百里以內應令總督調補之語  
向來也沒辦過此等案件所以未經聲明經總督叅  
奏我詳細查例水師條例內註明陸路水師各員缺  
與木員距籍在五百里以內應令調補當時我因甘  
省並無水師遂未詳查此例以致漏敘實係一時疎  
忽等供連日熬訊加以刑嚇該吏堅供並無撞騙賄

申恐係恃無質證強詞抵飾等語案關部中書吏題  
補違例未便據該吏一面之詞遽信並無賄囑致滋  
輕縱現將俞家鳳暫行監禁著那彥成查該弁等如  
俞家鳳實有書信往來輾轉賄囑情弊卽取具王一  
鳳等確切供詞將該員等奏請解任派員押解刑部  
以憑質對如並無賄囑情事亦卽據實覆奏欽此仰  
見

皇上明刑折獄須有確據使奸胥無可推飾

臣跪讀之

下欽佩難名遵卽傳集徐福王一鳳查訊據徐福  
到案卽行供明並呈出兵部書吏俞靄堂寄伊之

信

臣

闕視信內云如願早陞都閩部中可以辦出

不必在外謀題免致費事筆枝必須六百並須印  
行帶京以便先事布置等語並據徐福供稱筆枝  
六百係要銀六百隱語伊接此信心中疑懼並未  
覆信亦未與銀兩至俞謫堂是否係俞家鳳別名  
不得知道又據王一鳳供伊補缺時未曾接過部  
書信函是實

臣

又查得喇課營千總黃建元係西

寧人山部題補西寧鎮海堡守備員缺亦係違例

因密派員弁查出俞謫堂寄黃建元信一封內云

足下擬陞守府一事現有機會可乘惟籌自筆必

須八百枝方可敷行除已寄到白筆一百枝尙短  
七百枝望卽設法齊全專人送京等語伏思臣與  
在部臣身受

殊恩均應以政事爲重各勤其職臣何必與部臣爲難

惟因風聞甘肅武職陞補無不被部書需索陞題  
者若需索不遂則設法駁改若由部題推者需索  
更多是以近來兵部題缺之案自內則掣補參差  
由外則准駁任意幾致無可遵循如現在查出俞  
壽堂書信一事都守三缺一則六百一則八百則  
等而上之副將叅將非一三千兩不可是臣前次

風聞並非虛假况徵末武弁動費盈千累百一經  
得缺到任不刻削兵丁必虧空官項種種弊竇田  
此而生營伍何能整頓且兵部明白迴奏內稱係  
掣補今書吏可以指名索費卽可以違例指名題  
補公同掣補之謂何而令書吏肆行無忌操權能  
如此響應至選司之員銓選是其專司若非朋比  
分肥何以任聽書吏高下若此亦應請

旨革職交部審訊有無通同作弊之處定擬治罪俾知  
銓政紊亂外省亦可敢於陳奏上達

天聽庶以後舞弊之風可以少戢至兵部補缺舊例既

多含混新例又久不頒行而所用卽前預保人員更有紊亂之處總之書吏便於例條牽混方得易爲准駁容臣逐細查明例案另行奏請

皇上訓示飭部明白核覆以便遵行守備王一鳳堅供並無書信賄囑徐福係到案卽行供明並無回信行賄各情事應暫免解京聽候刑部審訊俞家鳳確供行知後再行遵辦黃建元一員卽調來省卽行派員押解進京以便質訊謹將原信二件恭呈

御覽謹

奏奉

硃批所辦甚屬認真可嘉之至另有諭旨

道光三年十月二十九日奉

上諭前據刑部奏審訊承辦陝甘武弁王一鳳徐福二  
案之兵部書吏俞家鳳供詞狡展當經降旨交那彥  
成詳查該弁等有無與俞家鳳書信往來賄囑情弊  
茲據該督查明王一鳳補缺時並未接過部中書吏  
信函惟徐福到案時卽行呈出兵部書吏俞誨堂寄  
伊信一封并查出千總黃建元由部題補守備時俞  
誨堂亦寄有信一封均係索贓實據將原信呈覽請  
旨查辦著交原派大臣托津英和汪廷珍會同刑部



堂官將書吏俞家鳳嚴行審訊毋任強詞抵飾兵部  
司員難保無通同舞弊朋比分肥情事一併向該書  
吏等嚴密根究據實奏參懲辦

道光三年十一月初二日

奏爲查明兵部補缺條例含混參差請

旨飭部核議俾易援引而杜弊端事竊臣前參兵部題

補武職違例舞弊一摺欽奉

上諭著兵部堂官明白迴奏並派托津英和汪廷珍乘  
公查辦欽此旋據托津等奏奉

上諭那彥成亦著交部議處朱永福一案該督是否越

次保題著將接到部文月日查明咨部核辦欽此欽遵行知前來臣因兵部補缺之例率多含混而所用卽補預保人員更有紊亂之處當於覆

奏查出兵部書吏索贓書信摺內聲明容另詳查奏請

訓示在案伏查托津等奏稱陝甘總督那彥成原單內所引三缺一輪係各省通例兵部覆奏單內所引六缺一輪係陝甘二省及四川松潘一鎮專條既有專條自不得牽引別省通例至嘉慶二十二年兵部纂修中樞政考時於陝甘二省另立專條內

載陝甘二省應題遊擊都司各缺出應用綠營時  
專用預保人員掣補如無應掣之員行文該督以  
現任人員題補等語此又係兵部辦理陝甘兩省  
歷屆舊章於嘉慶二十二年始行纂入新例者又  
因改纂處分則例於道光元年奏明將新例暫緩  
頒行臣查中樞政考內載陸路副將叅將遊擊都  
司守備各應題缺出如係有預保省分將預保註  
冊現無事故人員由部掣補一缺後行令該督撫  
以揀發人員題補一缺再於應陞應補人員內題  
補一缺三缺一輪週而復始陝甘二省四川松潘

一鎮揀發旗員照該處輪用旗員之例補用不入  
此項輪班內計算漢員揀發者仍入此班輪算等  
語今兵部既指此條係別省通行何以此例內云  
云陝甘二省漢員揀發者仍入此班輪算陝甘揀  
發人員既入三缺一輪之班卽不得謂係別省通  
例又查中樞政考內載陝西甘肅二省及四川松  
潘一鎮題補遊擊都司缺出以第一缺補用旗員  
第二第三第四第五第六缺補用綠營過而復始  
照此計缺輪用等語兵部既定此例爲陝甘二省  
專條何以又於嘉慶二十四年閏四月初五日行

文令照三缺一輪之例於開缺之日各計各缺挨次辦理况六缺一輪之例五缺俱用綠營並未載明由部掣補預保幾缺由外題補幾缺亦未指明應用何項人員自來含混辦理以致書吏顛倒作弊而外省竟至無所遵循臣前因由部將預保人員連補都司四缺與一預保一揀發一應陞應補內外輪用成例迥不相侔是以據實奏

聞今准托津等咨知有未行之新例應題遊擊都司各缺出應用綠營時專用預保人員題補如無應掣之員行文該督以現任人員題補殊不思此五題

缺若盡由部掣預保人員則外省之揀發並應陞  
應補人員將終身無缺可補况兵部每見預保人  
員將次用完卽行令保題是新例所載如無應掣  
之員行文該督以現任人員題補之語亦屬有名  
無實推原其故將題缺盡由部掣不過爲佔缺地  
步而盡用預保之員又不過因預保人員姓名都  
中早已有案遇一缺出書吏則逢人寄信索賄許  
爲謀幹是部中常有預保人員則題缺盡由部補  
弊之所生實由於此且題缺有關緊要預保人員  
未必盡皆人地相宜尤宜內外間補以重地方營

伍定例既多淆混不得不奏明仰求

聖斷查副叅以及守備七缺六缺一輪之例除每

輪第一缺補用旗員外其餘之缺盡歸部掣固屬

備枯若俱由外題亦礙銓政臣愚昧之見在部止

有預保一項在外則有揀發及軍營保舉軍政卓

異年滿合例應陞應補數項人員若將各題缺仿

照吏部文職補缺之例指明何項人員應補如副

叅七缺一輪第一缺用旗員第二缺用某項人員

第三缺用某項人員第四缺用某項人員第五缺

用某項人員第六缺用某項人員第七缺用某項

人員並將陝甘二省與四川松潘一鎮如何輪用之處明立科條依次補用庶免偏倚而部中書吏亦難牽混准駁再於掣補預保人員時仍令御史赴部監掣更昭公允以杜弊端是否有當伏乞

皇上勅部核議施行又據托津等奏稱兵部覆奏單內有朱永福於上年六月十七日奉

旨卽補當卽行知之語該督接奉專案行知自應遵照乃以應陞人員越次保題俟查明該督接到部咨月日另行核辦臣查上年七月二十日經前督臣長齡任內接准兵部六月二十七日咨開六月十



七日奉

上諭守備孟兆元許伏千總朱永福均著以應陞之缺  
卽補欽此許伏經該督咨部更復本姓徐福應將孟  
兆元徐福朱永福等員自欽奉

上諭之日爲始遇有陝甘二省題推缺出該督卽行題  
補如部中出有該二省題推缺出本部亦卽擬補  
相應知照陝甘總督遵照辦理在案迨至九月

臣

到任接准兵部二咨亦係部中出有甘肅涼州鎮  
標後營都司題補之缺兵部將預保守備富森布  
於七月二十二日題准補用一係部中出有甘肅

永昌營中軍都司題補之缺兵部將預保守備周炳南於七月二十三日題准補用其時臣不知兵部先有飭將孟兆元徐福朱永福等遇缺卽補之文隨因出有大靖營守備員缺揀選得應陞之千總王一鳳弓馬優嫻年力精壯且打仗得受鎗傷至今鎗子未出微勞素著於十月十七日具

題請補此臣因准部文照常例題補都司各缺亦照

常例題補守備致未先將朱永福補缺並非越次保題之原委也今准

欽派大臣托津等咨查前來除將前任接准部文月日

咨知該部核辦外竊思兵部既於上年六月行文軍營出力卽補人員應行遇缺先補何以七月部中出有都司二缺又舍卽補之孟兆元徐福而補預保之富森布周炳南遲至本年二月始將孟兆元擬補陝西漢中城守營都司三月始將徐福擬補甘肅西寧城守營都司顛倒錯亂外省無所適從是否部中另有新例未行亦乞

勅部查明示覆謹

奏

道光三年十一月二十日奉

上諭那彥成奏查明兵部補缺條例參差請飭部議一摺著仍交原派大臣托津英和汪廷珍會同兵部堂官詳查例案悉心妥議具奏

道光三年十二月十一日奉

旨前據那彥成奏兵部補缺條例參差當交托津等會同兵部堂官詳查妥議茲據查明例案並無參差弊混惟嘉慶二十四年閏四月兵部通行文內摘敘陸營水師題補三缺一輪通例而於陝甘省行文內未將該省專條一併列入實屬疎漏所有辦理此案之兵部堂司各官著交部分別議處至朱永福等以應

陸之缺卽補該省旣於上年七月間接到部文該督  
係接管之員自不得諉爲不知乃於十月間將千總  
王一鳳越次保題那彥成亦著交部議處餘依議

推薦賢能

道光三年正月二十四日

奏爲遵

旨揀員調補總兵恭摺具奏事竊

臣

接准兵部咨開欽

奉

上諭那彥成奏陝西南山總兵出缺請旨簡放一摺陝

西陝安鎮總兵員缺緊要著該督於陝甘總兵內揀

員調補所遺員缺著德克金布補授欽此

臣

查陝安

地處南山界連川楚林深箐密奸宄最易潛踪一

切防範稽查撫綏彈壓在在均關緊要必須熟悉

情形辦事勇往之員方克勝任臣與提臣楊遇春

往返相商查有涼州鎮總兵馬騰龍年四十九歲

四川成都縣人行伍出身歷經出師黔楚川豫陝

甘等省屢著勞績洊陞副將道光元年奉

旨陞授今職該員操守廉正訓練有方本籍四川與陝

安相近情形亦爲熟悉現在臣隨同辦理番族事

宜深知其可信以之調補陝安鎮總兵實於地方

有裨如蒙

俞允所遺涼州鎮總兵員缺遵

旨卽以德克金布補授謹

奏

道光三年二月十六日奉

上諭那彥成奏揀員調補總兵一摺著照所請陝西陝安鎮總兵員缺准其以馬騰龍調補所遺涼州鎮總兵卽以德克金布補授該部知道

道光三年正月二十四日

奏臣前經拏獲巨盜麻木溝等審出漢奸多在永固城一帶居住因金塔協副將馬光宇人尙勤幹調署永固協副將責令專司緝捕茲准兵部咨開該副將馬光宇於奉委查辦肅州馬厰被搶一案未



能查出實情照例降二級調用奉

旨准其抵銷復查馬光宇僅有紀錄四次抵降一級仍應降一級調用奉

旨著該督出具考語送部引見欽此咨行前來理應飭令馬光宇交卸進京惟查馬光宇自到永固協任以來先後拏獲漢奸多名緝捕極爲勤奮現在未獲逸犯尙有三十餘名臣仍飭令嚴拏且永固地處沿邊與野牛溝私金廠等處毘連現在甫定巡哨查緝章程正資熟手惟查馬光宇係公罪是以部議准抵一級因級不敷抵仍令送部引

見合無仰懇

聖恩俯准將馬光宇暫留永固協之任俟一半年辦理  
就緒奸宄淨盡後再行出具考語送部引

見於防邊緝捕實有裨益謹

奏

道光三年二月十六日奉

上諭那彥成奏副將馬光宇請暫緩引見等語甘肅現  
署永固協副將馬光宇前因委辦馬厰被搶一案未  
能查出實情部議降調當經降旨令該督出具考語  
送部引見茲據那彥成奏稱永固地方現在辦理防

邊緝捕事宜正資熟手請將該員暫緩引見著照所  
請馬光字准其暫留永固協副將之任俟一半年後  
再行出具考語送部引見該部知道

道光三年二月十五日

奏為酌調要缺總兵以重戎行事竊查甘肅河州東  
接洮岷西連循貴居民漢回雜處而回民居其大  
半內有撒拉爾一種性尤獷悍易滋事端該河州  
鎮總兵彈壓稽查甚非易易且所管循化起臺保  
安三營俱屬番地佔踞河北野番現已掃數回巢  
則此後循保起三營鈴制番族必須該鎮調度有

方始能使番族革面洗心畏而兼服現任總兵多  
隆武居官謹飭亦能整頓營伍而才具不能開展  
久任河州竊恐人地未宜難期得力查有現任巴  
里坤鎮總兵張拱辰勤幹有爲屢經出師著績曾  
任大通協副將於邊務番情均爲熟悉以之調補  
河州鎮要缺總兵可期勝任至巴里坤雖係口外  
重鎮然該處地方靜謐事務甚簡較之河州難易  
迥殊若以多隆武調補亦可無虞曠職相應奏懇  
皇上天恩俯准以張拱辰調補河州鎮總兵以多隆武  
調補巴里坤鎮總兵如此一轉移間則彼此相宜

於地方實有裨益臣與提臣楊遇春往返札商意

見相同謹

奏

道光三年三月初二日奉

上諭那彥成奏酌調要缺總兵一摺著照所請張拱辰  
准其調補甘肅河州鎮總兵所遺巴里坤鎮總兵員  
缺卽著多隆武調補該部知道

道光三年三月十九日

奏爲要缺知州需員籲懇

聖恩俯准陞補以重地方事竊照固原州知州夏祥培

奉

旨准陞循化同知所遺固原州知州要缺例應在外題  
調據藩臬兩司詳稱於通省知州內逐加遴選查  
有大通縣知縣應暉復浙江舉人大挑知縣簽掣  
甘肅親老告近改掣江西旋丁憂回籍服滿仍赴  
甘肅試用

題署大通縣知縣道光元年六月二十四日奉

旨實授嗣因勦辦西寧番賊隨營出力經前督臣長齡  
保奏奉

旨著以應陞之缺陞用該員老成幹練有守有爲以之

陞補固原州知州竇堪勝任詳請具

奏前來

臣

覆查固原州缺居衝要駐劄重兵漢回襍

處撫馭極關緊要必須老練習事之員方克勝任  
該員應曙霞才守兼優辦事幹練現於大通縣任  
內拏獲趙牙信韓百林漢奸首犯二名餘犯多名  
最爲出色出力且係軍營著有勞績欽奉

特旨應陞人員一切因公處分例得勿計聲明專摺具  
奏仰懇

聖主天恩俯准以大通縣知縣應曙霞陞補固原州知  
州於要缺實有裨益謹

奏

道光三年四月初三日奉

上諭那彥成奏揀員陞補要缺知州一摺著照所請甘肅固原州知州准其以應曙霞陞補送部引見該部知道

道光三年四月二十五日

奏爲附郡首邑要缺需員奏懇

聖恩俯准補授以重地方事竊照張掖縣知縣胡秉虔遺缺例應在外揀選調補據藩臬兩司詳稱在於通省現任對品人員內逐加遴選查有西寧軍營



出力奏奉

諭旨以知縣遇缺卽補之臯蘭縣紅水縣丞沈在光安徽石埭縣人由供事議敘未入流選授隆德縣典史十八年九月調赴河南滑縣軍營辦事奏奉

諭旨以應陞之缺儘先陞用嗣補臯蘭縣河橋主簿因辦理豫陝軍需報銷事竣奏奉

上諭沈在光准其以應陞之缺陞用咨補紅水縣丞道光二年勅辦西寧野番該員隨營出力經前督臣長齡奏奉

上諭著以知縣遇缺卽補欽此該員謹飭有爲品端才

裕以之補授張掖縣知縣實屬人地相宜詳請具  
奏前來臣覆查張掖縣係附郡兼三要缺爲新疆往  
來孔道駐劄提標重兵政務殷繁非明幹勤慎之  
員治理難期勝任該員沈在光才幹有餘居心端  
謹並無叅罰案件且係軍營出力奉

旨著以知縣遇缺卽補之員合無仰懇

聖恩俯念地方緊要准以沈在光陞補張掖縣知縣實  
於要缺可收得人之效與例亦屬相符謹

奏

道光三年五月二十九日奉

上諭那彥成奏揀員陞補附郡首邑要缺知縣一摺著照所請甘肅張掖縣知縣准其以沈在光陞補仍照例送部引見該部知道

道光三年六月初十日

奏臣接准部咨欽奉

上諭屠之申前任直隸藩司任內隸事降爲知府留於直隸候補嗣經那彥成奏准調赴甘肅差遣委用現在西寧辦理番案業已竣事屠之中熟悉直隸地方情形著仍回直隸交蔣攸銛差遣以道府用欽此臣查屠之申於上年冬間奏調來甘隨同辦理番案

甚爲得力嗣經奏署西寧道篆出口散放賑恤蒙  
古口糧亦極妥協深悉蒙番情形諸事均中肯要  
茲奉

諭旨仍回直隸差遣應卽遴員接署西寧道篆以便該  
員交卸起程查本任道員德興尙在烏魯木齊不  
克卽時到任臣查有平慶涇道劉澐卸署安肅道  
篆尙未回任該道在甘年久熟悉邊情以之委署  
西寧道卽務可資治理再查番族回巢之後經西  
寧辦事大臣武隆阿親履巡查該營之千伯什戶  
感沐

皇上天恩賞給頂戴約束番衆甚爲嚴謹數月以來並無據報搶竊之案武隆阿於彈壓撫輯事宜辦理甚屬認真可靠現在邊隅綏靖蒙古各安遊牧實堪上慰

聖懷謹

奏奉

硃批知道了

道光三年六月十三日

奏查現署鹽茶營都司千總游棟雲前於盛夏鎮總兵任內被屬弁江芝挾嫌列款揭控經前任督

臣

長齡訊屬虛誣奏奉

諭旨游棟雲前已降旨罷斥念其曾在軍營著有勞績遠  
予廢棄亦覺可惜著加恩賞給經制外委交與固原提  
督楊遇春標下差遣委用不准該提督保奏候朕施恩  
欽此嘉慶二十四年恭逢

仁宗睿皇帝六旬萬壽奉

恩旨游棟雲著以千總用遇缺卽補欽此經長齡拔補西  
安鎮左營千總嗣因鹽茶地方緊要添設營汛需  
員經理委令署理該營都司臣現較閱固原營伍  
詢之提臣楊遇春面稱游棟雲感激

天恩遇事奮勉辦理新添營汛事務均極妥善臣查游

棟雲由四川武舉拔補把總出師黔楚川陝豫等  
省游陞總兵在軍營十有餘年傷多且重該弁現  
年六十一歲精力健壯弓馬嫻熟曾任總兵大員  
熟悉營伍自蒙

恩賞給千總之後深知感奮辦理鹽茶新添營汛事務俱  
臻妥協可否仰懇

皇上量予

恩施之處出自

鴻慈謹

奏

道光三年六月二十七日奉

上諭那彥成奏請將辦理營汛妥協之千總量予恩施等語甘肅署鹽茶營都司千總游棟雲前在軍營著有勞蹟嗣因獲咎降補千總於署理鹽茶新添營汛事務俱臻妥協游棟雲著加恩以守備用該部知道  
道光三年七月十六日

奏爲要缺知州需員籲懇

聖恩俯准陞署以重地方事竊照陞補狄道州知州席存澄因患病告請回籍調理所遺狄道州知州要



缺例應在外題調茲據藩臬兩司詳稱在於簡缺  
知州內逐加遴選查有玉門縣知縣范伯棠守潔  
才優辦理地方事件結實可靠堪以陞署狄道州  
知州惟歷俸繁缺未滿三年與例稍有未符詳請  
具

奏前來臣查狄道州地方漢回雜處俗悍民刁素爲  
州縣中難治之區該員范伯棠清操自守辦事勤  
能且前署合水隴西等縣缺至清苦繼陞金縣尤  
爲東路冲途苦累之缺該員俱能廉謹自勵刻苦  
辦公不但倉庫錢糧毫無虧短卽遇緊要差使亦

從未派及閩閩到處民情均深愛戴似此廉能出色之員自應稍予鼓勵以示矜式合無仰懇

聖恩俯念地方緊要准以范伯棠陞署狄道州知州於要缺實有裨益且足以鼓勵賢員而示激勸如蒙俞允照例給咨送部引

見仍俟扣滿年限另請實授謹

奏

道光三年八月十七日奉

上諭那彥成奏請陞署要缺知州一摺著照所請甘肅狄道州知州准其以范伯棠陞署俟扣滿年限另請

實授照例送部引見該部知道

道光三年八月初十日

奏爲西寧鎮總兵要缺遵

旨揀選人員奏請

欽定簡用以重邊防事本年七月二十九日奉

上諭文幹所出駐藏大臣員缺著松廷調補卽由西寧

馳驛前赴新任穆蘭岱著補放鑲黃旗漢軍副都統

授爲西寧辦事大臣所遺西寧鎮總兵員缺緊要著

那彥成於陝甘兩省總兵內揀員奏請調補如揀選

無人卽秉公保奏一員候朕簡用西寧鎮總兵未經

簡放以前仍著穆蘭岱兼署欽此查松廷尙未到甘  
今臣遵卽恭錄

諭旨備文由東路飛咨松廷改赴西藏新任一面移知  
穆蘭岱接授西寧辦事大臣篆務仍兼署西寧鎮  
總兵以便令武隆阿交卸進京伏思西寧鎮設處  
邊陲蒙番甫經安輯一切操防控制最關緊要非  
老成幹練之員弗克勝任今遵照

諭旨揀得涼州鎮總兵德克金布開展體面認真營務  
堪以調補惟係甫經到任於蒙番情形未能深悉  
陝甘各副將中堪以陞補者謹遵

旨揀得三員開單註考恭呈

御覽可否卽調德克金布或於各副將內

簡放一員之處伏候

聖明定奪謹

奏

道光三年九月二十一日奉

上諭那彥成奏總兵員缺緊要請簡一摺甘肅西寧鎮  
總兵著榮玉材補授

道光三年九月十七日

奏署永固協副將馬光宇前在金塔協任內奉長齡

委查肅州馬廠被搶一案未能查出實情經部議  
實降二級係公過除抵銷外仍應降一級調用奉  
旨著該督出具考語送部引見欽此臣因馬光宇自到  
永固拏獲漢奸多名緝捕極爲勤奮奏奉

恩旨據那彥成奏稱永固地方現在辦理防邊緝捕事  
宜正資熟手著照所請馬光宇准其暫留永固協副  
將之任俟一半年後再行出具考語送部引見查口  
外金廠雖經奏禁惟利之所在奸匪時刻覬覦自  
春間嚴拏之後至今秋又不免間有一二偷挖之  
人該員馬光宇感激

天恩益加訪緝且深悉地理情形於此時又加緊查拏  
現又續獲數名實心任事始終不懈查該員馬光  
字降調之案係屬公過且經議處之後極知感奮  
著有微勞功過似可相抵可否將其仍降一級調  
用處分開復免其送部引

見出自

皇上逾格

恩施

臣

亦得收指臂之效謹

奏

道光三年十月初五日奉

上諭那彥成奏署永固協副將馬光宇緝捕勤奮請將該員從前降一級調用處分開復等語馬光宇著加恩改爲降一級留任毋庸送部引見該部知道

道光三年十一月二十九日

奏爲邊番要缺同知需員籲懇

聖恩俯准陞補以重地方事竊照貴德同知周廷芬叅革遺缺係繁疲難三項要缺例應在外陞調該廳地居番境與蒙古游牧地方僅一黃河之隔去冬各野番甫經驅逐回巢凡編排保甲偵緝漢奸稽核糧茶嚴禁偷渡在在均關緊要必得精明強幹



熟諳番情之員辦事認真而又撫馭得宜方臻安帖臣督同藩臬兩司在於通省現任對品人員內詳加遴選均皆人地不宜惟查有通渭縣知縣繆庭槐順天宛平縣人乙丑科進士奉

旨以知縣卽用簽掣河南

題補項城縣知縣丁憂回籍服闋赴部候補嘉慶二十一年揀選引

見奉

旨繆庭槐著馳驛發往甘肅差遣委用欽此

題補通渭縣知縣副經調署涇州直隸州知州該員

才具幹練奮勉向上在廿七年頗著循聲雖有地  
丁停陞處分供案屬因公番地正當需人治理例  
得專摺具奏據藩臬兩司具詳前來除檄委該員  
先往署理外合無仰懇

聖恩俯念地方緊要准以通渭縣知縣繆庭槐陞補貴  
德同知於邊番要缺可期得力謹

奏

道光三年十二月十五日奉

上諭那彥成奏遵員陞補邊番要缺同知一摺著照所  
請繆庭槐准其陞補貴德同知照例送部引見該部

知道

道光三年十一月二十九日

奏爲遵

旨保舉堪勝總兵之副將事竊臣接准兵部咨奉

上諭現在記名陸路副將人員將次用竣遇有陸路總兵缺出簡放之人著各省總督及兼管提督之巡撫於所轄副將內擇其品藝優長曉暢營務堪膺專閫者各保奏一二員出具切實考語送部引見候朕簡用欽此仰見我

皇上慎重戎行儲材備用之至意伏思總兵爲專閫大

員必得明幹有爲操防可信之員方足以資表率  
經臣於陝甘兩省副將內就其平日居官才識秉  
公遴選查有

奏請調補督標中軍副將之靜崑協副將德克登額  
年四十九歲鑲黃旗滿洲岳慶佐領下人由前鋒  
出征湖北川陝西寧等處屢次打仗立功帶傷蒙  
恩賞戴花翎陞今職該員年力精強操防嚴肅人亦  
體面小心歷練又固原提屬靖遠協副將札坤珠  
年六十一歲正藍旗滿洲保德佐領下人由健銳  
營前鋒校歷陞今職曾經出征石峯堡並川陝楚

豫各省打仗著績該員營伍熟悉人亦結實可靠  
雖年已六十精力未衰以上二員均堪膺總兵之  
任謹遵

旨出具切實考語恭摺奏

聞如蒙

俞允再行給咨送部引

見恭候

欽定謹

奏奉

硃批均著送部引見

道光三年十一月二十九日

奏爲新設邊番佐襍要缺揀員補署事竊照循化廳  
新設主簿貴德廳新設照磨皆係邊番要缺應行  
在外揀調臣與藩臬兩司在於通省現任佐襍內  
逐加遴選非不諳番情卽才欠幹練一時實無堪  
調之員惟查有試用州同郭學泗山西芮城縣附  
貢生由

實錄館臚錄議敘州同分發甘肅試用歷署州同州判通  
判該員老成歷練辦事謹飭上年隨同臣辦理番  
案於番地情形最爲熟悉以之借署循化廳主簿

可期得力又裁汰按察司照磨張溥湖北江夏縣  
人由供事咨送

實錄館議敘從九品分發甘肅試用咨署鹽茶廳照磨現  
因裁缺候補該員年力富强實心任事在甘最久  
素蓄番情以之借補貴德廳照磨亦堪勝任合無  
仰懇

聖恩俯念新設邊番員缺緊要准以郭學泗借署循化  
廳主簿張溥借補貴德廳照磨均可資其佐治臣  
為番地要缺必須得人起見謹

奏

道光三年十二月十五日奉

上諭那彥成奏揀員補署邊番要缺佐襍一摺著照所請甘肅循化廳新設主簿准其以試用州同郭學泗借署俟試署期滿另請實授貴德廳新設照磨准其以候補按察司照磨張溥借補該二員俱著照例以原銜陞轉該部知道

道光三年十一月二十九日

奏爲遴派道員接辦寧夏渠工事竊

臣

前因寧夏道

員缺專司閭屬渠工今冬均須詳勘估修務於春

耕以前辦理完妥方不致悞農工前經

臣

奏請將



鞏秦階道劉斯喟調補該員現奉

恩旨已陞授浙江鹽運使其新任寧夏道瑞慶鞏秦階

道富祥現在尙未來甘臣查瑞慶係軍機章京富

祥係刑部司員平日雖俱熟識然其辦理外任事

務才具實未深知俟該員等到任以後當謹遵

諭旨留心察看應以何員補授何缺之處再行具奏惟

寧夏各屬渠工前經陞道劉斯喟查勘情形分

別應改應修陸續稟商業已漸有章程現在必須

選派妥員前往接手計工集料方可來春及早興

工不致臨期遺悞茲查有蘭州道楊翼武居心純

正廉明質直從前曾任寧夏府知府熟悉水利情  
形民情至今愛戴合請專派該道前往接辦渠工  
可期妥善將來新任道員到後並可會同商度藉  
資習練其蘭州道現無緊要事務所有日行案件  
飭令蘭州府知府桂明代折代行毋庸另行委員  
接署臣因要工擇人起見謹恭摺具奏再劉斯崑  
接奉

恩旨自應交卸起程前赴新任所有寧夏道一缺臣現  
已檄委寧夏府知府賈履中就近暫行兼護謹  
奏奉

硃批知道了

道光三年十二月十七日

奏爲察看新授道員堪以勝任恭摺覆奏事竊

臣前

奉

上諭那彥成奏寧夏道員缺緊要請以劉斯崑調補所  
遺鞏秦階道卽請以簡放之員補授等語昨經降旨  
將劉斯崑補授浙江鹽運使寧夏道前已簡放瑞慶  
鞏秦階道已將直隸大順廣道富祥調補所有寧夏  
道一缺著該督俟瑞慶富祥到任後留心察看如須  
酌量對調之處據實奏明辦理如該道等均於寧夏

道缺人地未宜著該督於陝甘道員內另揀一員奏請調補可也欽此仰見

皇上任官惟賢慎視要缺之至意茲新授寧夏道瑞慶業經到省臣細心察看該員才具明晰應對公事頗覺暢達臣告以寧夏渠工利弊總須親身往來

河干勤慎講求嚴密查察有弊卽懲有利必興該員年力正強志氣尙屬勇往當能耐勞任事且來歲興修各渠要工臣已

奏明專派蘭州道楊翼武前往督辦楊翼武熟諳地方政務人復樸實同寅和衷不惟渠工事宜瑞慶

與之商辦可期日久諸悉卽監司一切事件亦可  
向其討論現在甘省道員亦無可調自應遵

旨卽令瑞慶前赴寧夏新任其劉斯崑所遺鞏秦階道

一缺俟富祥到甘亦卽令往接印任事臣仍留心

查看如果有應須酌調之員再行具奏謹

奏奉

硃批知道了

道光三年十二月十七日

奏爲揀員陞調要缺副將恭摺具奏事竊臣前因督

標中軍副將德楞額蒙

恩陞授四川建昌鎮總兵所遺員缺隨將靜寧協副將  
德克登額

奏請調補聲明靜寧協一缺容臣與楊遇春商定揀  
員請補現已接奉

上諭陝甘督標中軍副將准其以德克登額調補欽此  
所遺靜寧協副將員缺本係題缺該處漢回雜處  
地當衝道鎖輯必得其宜甚關緊要臣札商提臣

楊遇春復稱寧陝營叅將寶德體面幹練以之陞  
補寶堪勝任臣查寧陝營叅將寶德年五十一歲

蘭州府皋蘭縣人曾經出征川陝河南打仗著績

蒙

恩賞換花翎陞今職該員曉暢營務打仗奮勇人亦明

白可靠臣前任陝甘總督時該員充當巡捕辦事

卽屬端正勤幹前督臣長齡亦所深知臣此次到

甘曾與提臣楊遇春密商參將內堪膺副將之人

其時卽據楊遇春首稱該員寶德人寶體面可靠

現在靜寧協一缺本擬以該員請陞惟該員籍隸

甘肅請陞本省副將與例不符經臣復加揀選查

有現署永昌協副將之陞補潼關協副將之蔡文

瑾年四十九歲四川西昌縣人曾經出征川陝湖

廣西寧打仗著績蒙

恩賞換花翎陞今職該員年力強壯訓練有方以之調補靜寧協副將實屬相宜如蒙

俞允其蔡文瑾所遺潼關協副將合無仰懇

聖恩俯准以寧陝營叅將竇德陞補可期於營伍地方均有裨益再該員亦屬合例應陞惟潼關協一缺本應部推竇緣該協爲陝甘門戶扼要專營亦關緊要臣與楊遇春往返札商意見相合是以請將竇德陞補可否之處出自

天恩謹



奏

道光四年正月初八日奉

上諭那彥成奏揀員陞調要缺副將一摺著照所請甘肅靜寧協副將准其以蔡文瑾調補所遺潼關協副將卽以寶德陞補該部知道

道光四年三月十二日

奏爲遊員陞補要缺都司守備恭摺具奏事竊照漢

中鎮屬西鄉營都司張洪洲前經陝西撫

臣

盧坤

以該員材技雖屬可觀於所轄地方不甚相宜奏

明交

臣

撤回酌量另補并准兵部知照前來

臣

當

卽調驗張洪洲實因節經出征軍營受傷目力稍覺遲鈍而年力健壯尙不致成篤疾查有寧夏鎮屬橫城營都司馬輔相派赴烏什駐防所遺之缺卽暫委該員前往署理再行察看酌其去留查西鄉營都司一缺例應在外題補該營設處南山於老林一帶最爲切近稽查奸宄巡緝地方在在均關緊要必須曾歷戎行熟悉情形之員方能勝任經<sub>臣</sub>詳加揀選得陝西盩厔營守備陳金綬年四十五歲四川岳池縣人由行伍拔補千總陞補今職該員打仗奮勇差操勤慎久歷漢南諸稱諳練

歷俸已滿任內亦無叅罰服制事件請陞都司與  
例相符再查陝營守備劉福因病辭退所遺寧陝  
營守備一缺亦屬南山要隘一切彈壓巡防必得  
練悉可靠之員方能得力臣查有固原提標前營  
千總向榮年三十三歲甘肅固原州人由行伍拔  
補千總於道光二年六月領劄任事該弁人頗明  
晰出師著績以之陞署前項守備實屬人地相宜  
惟歷年未滿六年與例稍有未符但該弁係勦捕  
西寧番賊案內前督臣長齡等保奏欽奉  
上諭以應陞之缺陞用之員合無仰懇

聖恩俯准以陳金綬陞補西鄉營都司向榮陞署寧陝營守備於南山營伍實有裨益謹

奏

道光四年三月二十八日奉

上諭那彥成奏遴員陞補要缺都司守備一摺著照所請陝西西鄉營都司准其以陳金綬陞補寧陝營守備准其以向榮陞署俱著送部引見向榮仍俟扣滿年限再請實授該部知道

道光四年五月二十五日會同固原提督楊公遇

春

奏爲遵

旨會保堪任西安鎮總兵之副將事竊准兵部咨奉

上諭伊犁鎮總兵員缺著珠勒亨調補所遺西安鎮總

兵員缺緊要著那彥成楊遇春會同保舉一員奏請

調補欽此欽遵咨會前來除分別移行遵照外伏查

西安一鎮駐劄省城營務殷繁地方緊要非老成

端謹訓練嚴明之員難膺斯選陝甘兩省總兵共

有十缺除西安鎮並口外之巴里坤鎮外此外尙

有八員或地居邊要未便遽更或人地非宜難期

得力現在總兵中實無堪調之員適臣楊遇春緣

查提屬營務來至蘭州因卽公同商榷遂於副將  
各員中就臣等平日深悉其居官才技者逐加遴  
選查有督標中軍副將德克登額先經臣等於上  
年遵

旨保奏堪勝總兵尙未赴部引

見又莊浪協副將李士林雖年近六十而精力甚強又  
潼關協副將蔡文瑾精明應練以上三員皆通達  
營務訓練有方且俱屢經出兵著有勞績委屬堪  
膺專閫之員謹開具該員等履歷清單各註切實  
考語恭呈

御覽合無仰懇

天恩卽賜揀拔一員補授西安鎮總兵於省垣要鎮實  
可期其勝任謹

奏

道光四年六月初九日奉

上諭那彥成等奏遵旨會保總兵開單請簡一摺陝西  
西安鎮總兵著德克登額補授

道光四年七月十一日

奏爲懇

恩陞署副將事竊臣標下中軍副將德克登額現蒙

恩旨補授西安鎮總兵其所遺員缺爲五營領袖事務

殷繁督率操防甚關緊要且時時隨同臣訓練弁

兵領袖通省尤須才技出衆精強公正之員方能

勝任臣於陝甘兩省叅將內詳加遴選並與提臣

楊遇春往返札商查有陝西慶陽營叅將如栢現

年五十二歲係正黃旗滿洲本佐領下人由世職

歷陞今職道光元年副叅列等案內經前督臣長

齡保列一等二年派赴西寧勦捕野番出力保奏

蒙

恩賞戴花翎該員誠實勤奮辦事老練現在委署中軍



諸臻妥協卽以之陞補副將可期勝任惟查該員  
現有親服應扣至本年十二月內始行服闋與陞  
補之例稍有未符第陝甘應陞叅將內非現居要  
缺卽不甚相宜別無堪以題補之員且近日旗員  
內甚不得人謹循專摺

奏請之例可否仰懇

聖恩俯念臣標下中軍副將員缺緊要准以如栢先行  
陞署俟服滿後另請實授庶臣指臂得人而綠營  
中各旗員得有鼓勵可望奮興起色謹

奏

道光四年七月二十九日奉

上諭那彥成奏請陞署副將一摺著照所請甘肅督標  
中軍副將准其以如栢陞署俟服闋後再行奏請實  
授該部知道

道光四年閏七月十六日

奏爲廢員年力未衰力圖報効懇

恩遵例捐復恭摺具奏事竊查甘肅試用知縣李于沈  
因前署西寧縣任內審辦民詞錯謬叅革發往軍  
臺効力嗣逢

恩赦釋回咨調來甘清釐經手事件完結後據藩司楊

健詳據該廢員李于沆稟稱現年五十二歲山東海豐縣舉人嘉慶十三年大挑一等分發甘肅試用二十二年署理西寧縣任內有容民曹鳳翎控告賈爾墜欠銀不償一案因傳喚被告賈爾墜躲避遂將鋪貨查封候質被本道陳啟文揭察經前督臣長齡

奏請革職解部訊明承審此案並未先傳中證吊驗欠約遽將鋪貨查封實屬辦理錯謬請

旨發往軍臺効力贖罪恭遇

恩赦釋回現奉咨調來甘查算經手款項業已清結自

揣年未就衰尙堪報効懇請照例捐復由司詳請  
核辦當經臣咨准部覆因在甘省具呈令卽查核  
案情酌量人材自行具奏復經行司覈議去後茲  
據具詳請

奏前來臣查吏部酌定捐復准駁條款內開實犯賊  
私姦偽等款仍卽議駁其過誤犯罪連累致罪情  
節尙輕者准予核辦又現行常例內載知縣捐銀  
三千兩如由軍臺已滿換回贖回者酌加十分之  
六各等語今該廢員李于沆係因辦理民詞錯謬  
且案未審結亦無實犯賊私又由軍臺奉

旨釋回與已滿換回贖回者無異核其情節較輕似與  
捐復之條相符且該廢員居官才具臣前任陝甘  
總督時知其才具有爲人亦樸直若終於廢棄亦  
覺可惜但可否准其捐復之處臣未敢擅便應請  
旨勅下吏部照例議覆施行謹

奏

道光四年八月初四日奉

上諭那彥成奏廢員年力未衰懇請捐復一摺甘肅已  
革署西寧縣試用知縣李于沆著准其捐復仍照例  
先行送部引見該部知道

道光四年九月十五日

奏爲委員兼署府篆請

旨簡放恭摺奏

聞事竊照寧夏府知府賈履中因病出缺現在另疏具

題所遺寧夏府篆務應卽遴員接署臣查有寧夏水

利同知張東序心地清楚辦事勤幹委令就近兼

署可期無悞茲據藩臬兩司詳請具

奏前來查寧夏府係衝繁疲難請

旨要缺伏祈

聖主迅賜簡放以專職守謹

奏

道光四年十月初四日奉

上諭甘肅寧夏府知府著武凌漢補授應曙霞著補授  
秦州直隸州知州其所遺固原州知州著王儵補授  
道光四年九月二十日

奏爲懇

恩陞補要缺知州以重地方事竊照靜寧州知州陸泳  
祺因病告請回籍調理所遺靜寧州知州要缺例  
應在外

題調茲據藩臬兩司詳稱在於通省府屬知州內詳

加遴選查有山丹縣知縣顏廷彥貴州進士以知縣卽用分發山東

題補莘縣知縣丁憂卽事因交代未清奉議革職限內全完

奏請開復二十一年選授甘肅安定縣知縣調補山丹縣知縣道光二年委署固原州篆務三年七月回任該員年強才明辦事勤幹以之陞補靜寧州知州實堪勝任等情詳請具

奏前來臣查靜寧州地處衝途差務殷繁漢回雜處

兼之駐劄重兵必須撫馭得宜熟諳地方情形之



員方足以資治理該員顏廷彥辦事老練倉庫無  
虧歷任甘省衝繁要缺辦理俱屬妥協惟任內地  
丁停陞處分與例稍有未協但人地實在相宜例  
得專摺具

奏合無仰懇

聖恩俯念要缺需員准以顏廷彥陞補靜寧州知州實  
於地方有裨謹

奏

道光四年十月初七日奉

上諭那彥成奏陞補要缺知州一摺著照所請甘肅靜

寧州知州准其以顏廷彥陞補照例送部引見該部知道

道光四年十月十五日

奏爲要缺直牧需員懇

恩俯准陞補以重地方事竊照涇州直隸州知州陳佳瑛現在因病告請回籍調理所遺涇州一缺臣與藩臬兩司在於對品直隸州知州內逐加遴選一時無可調補之員惟查有金縣知縣李焜四川舉人大挑一等以知縣用籤掣甘肅

題補古浪縣知縣調補金縣知縣四年補行三年

大計案內卓異保薦尙未赴部引

見查該員操持廉勤辦事精細且歷任繁簡各缺均能  
倉庫無虧實屬結實可靠之員歷俸已滿年限又  
係卓異應陞以之陞補涇州直隸州知州實堪勝  
任茲據藩臬兩司具詳前來合無仰懇

聖恩俯念涇州直隸州員缺緊要准以金縣知縣李焜  
陞補實於地方有裨謹

奏

道光四年十一月初二日奉

上諭那彥成奏揀員陞補要缺直隸州知州一摺著照

所請甘肅涇州直隸州知州准其以李焜陞補照例  
併案送部引見該部知道

道光四年十一月初十日

奏爲揀員借補要缺通判以重邊陲事竊照哈密通  
判伯慶現准部咨緣事降調所遺哈密通判要缺  
本班無人可調又無合例應陞旗員臣與藩臬兩  
司詳加商酌惟查有承辦軍務保奏奉

旨以同知補用先換頂戴之筆帖式志奎正紅旗滿洲  
官學生由筆帖式選授通政司筆帖式嘉慶二十

四年

京察一等引

見奉

旨陝甘總督衙門筆帖式著志奎補授欽此委署涼莊理事通判因勦辦西寧番賊隨營辦事出力前督

長齡保奏欽奉

上諭留於甘省以撫民同知補用先換頂戴該員安詳勤奮才力有餘在甘有年邊疆情形甚為熟諳惟該員係候補同知尙未得缺與例稍有未符然已曾經歷署衝繁要缺俱能辦理裕如以之借補恰密通判洵屬人地相宜例得專指奏請合無仰懇

聖恩俯念要缺乏員准以志奎借補哈密通判實於邊  
疆有裨謹

奏

道光四年十一月二十七日奉

上諭那彥成奏揀員借補要缺通判一摺著照所請哈  
密通判准其以候補同知志奎借補照例送部引見  
該員係同知借補通判將來著仍照原銜陞轉該部  
知道

道光四年十一月二十七日

奏爲南山總兵丁憂出缺揀員請

旨調補事竊

臣

於十一月十一日接據陝西陝安鎮總

兵官馬騰龍稟報該鎮現丁母憂例應回籍守制

請委員接署前來

臣

查陝安爲南山重鎮界連川

楚林密山深係五方襟處之區一切防範撫綏甚

關緊要矧本年山內地方間被旱澇偏災收成稍

歉現已時值嚴冬糧價昂貴尤須撫輯貧民嚴查

囑匪若非熟悉情形實心可靠之員難期周妥查

上次陝安鎮出缺曾奉

諭旨勅令揀員請調當經

臣

以馬騰龍奏准調補在案

現在該鎮丁憂出缺

臣

隨於陝甘二省總兵內悉

心遴選惟查有河州鎮總兵薛陞年五十一歲貴州畢節縣人由義勇歷經出師貴州川陝等省打仗奮勇屢著勞績洊陞雲南鶴麗鎮總兵去歲奉旨揀調來甘補授河州鎮總兵該鎮履任以來辦理營務最爲勤奮仰見

聖主知人善任俾臣得收指臂之助茲因陝安鎮員缺

緊要臣與提臣楊遇春往返札商以該鎮薛陞經

歷既多人亦勤奮且久在軍營於南山一帶情形極爲諳悉以之請調陝安鎮總兵實屬相宜臣委

因南山年歲歉豐時值冬令正當要緊爲地方起



見不揣冒昧檄飭卽速前往接署俟奉到

諭旨再行行知如蒙

俞允其所遺河州鎮總兵員缺管轄番回亦關緊要現

委莊浪協副將李士林暫行署理仍請

旨迅賜簡放以專職守謹

奏

道光四年十二月十五日奉

上諭那彥成奏據員調補南山總兵一摺祝廷彪曾任

陝安鎮總兵於該處情形較爲熟悉所有陝安鎮總

兵員缺著祝廷彪補授其請調總兵薛陞著仍回河

州鎮本任

道光五年正月十八日

奏爲揀員請陞銜途縣令以裨地方事竊照會寧縣

知縣尹特生現經

臣

奏准調補山丹縣知縣所遺會寧縣一缺

臣

督同藩

臬兩司在於候補試用各員內詳加察看人地多不相宜銜途緊劇之任未便以初任人員拘泥請補致滋貽悞因復於應陞佐雜內逐一遴選查有鞏昌府經歷杜體泰山西崞縣人由吏員考職正八品捐府經歷分發籤掣甘肅咨補鞏昌府經歷

六年俸滿保薦候陞該員才具有爲辦事細心在  
廿年久風土民情最爲熟諳代理州縣民情亦極  
愛戴辦理地方公事頗見勤能實爲結實可靠之  
員以之陞補會寧縣知縣洵堪勝任人地相需謹  
循例專摺奏請合無仰懇

聖恩俯念衝途縣令揀選不得其人准以杜體泰陞補  
會寧縣知縣實與地方有裨謹

奏奉

硃批吏部議奏

道光五年二月十二日

奏爲委員兼護道篆請

旨簡放事竊照甘涼道張本枝因病出缺所遺甘涼道篆務應卽遴員署理查甘涼所轄沿邊一帶二十餘里界接蒙番且爲新疆來往衝衢彈壓撫綏甚關緊要臣查涼州府知府英啟才守兼優歷練精明該員久任涼州熟諳該處情形前曾委護甘涼道篆辦理裕如以之就近兼護可期妥協茲據藩臬兩司具詳前來再查甘涼道係衝繁難請

旨要缺應請

聖主迅賜簡放以專責守謹

奏

道光五年二月二十八日奉

上諭甘肅甘涼道員缺著英啟補授

道光五年五月二十九日會同西寧辦事大臣穆

公蘭岱

奏查西寧鎮標前營千總李芝美年力壯健曾經勦  
捕川陝等處教匪屢次打仗殺賊帶傷著有勞績  
歷按把總道光二年勦捕青海賊番打仗奮勇經  
大學士前督臣長齡保奏蒙

恩賞戴藍翎道

臣

那彥成駐劄西寧辦理番案因該弁

屢次差委得力考驗弓馬去得隨即拔補千總去  
歲秋間臣等派赴沿邊康家寨地方緝捕搶劫分  
水嶺馱運官工木植牲畜案內要犯該弁奉差購  
線設法不辭勞瘁能將案內要犯全數弋獲並訪  
獲口外別案劫竊番賊多名甫經差竣卽值提臣  
齊慎查閱該鎮營伍因該弁箭未中式奏請降調  
自應照例辦理惟查該弁番情熟悉緝捕勤能歷  
經差遣甚爲得力若因一時箭未中式卽行降調  
未免可惜合無籲懇

天恩請將千總李芝美免其降調仍留千總本任勒限

學習罰令三年後方准陞調臣等不時考驗倘稍有生疎卽行斥革如此於整頓之中量爲區別亦足以示鼓勵而昭懲創臣等爲番案得力愛惜人材起見是否有當

高厚出自

鴻慈謹

奏

道光五年六月二十四日奉

上諭那彥成等奏請留降調千總等語西寧鎮標前營千總李芝美前因箭未中式經提督齊慎照例奏請

降調茲據那彥成等奏稱該員熟悉番情緝捕勤能  
歷經差遣得力著照所請李芝美免其降調仍留千  
總本任勒限學習三年後方准陞調該督等不時考  
驗如技藝稍有生疎卽行斥革該部知道

道光五年六月二十日

奏爲揀員請署番地通判以重邊陲事竊照巴燕戎  
格通判潘承忻因病出缺所遺員缺應歸部選因  
有邊俸期滿撤回內地候補之通判佛靈阿聲明  
扣留請補嗣因吐魯番邊要同知出缺別無可調  
之員現經<sub>臣</sub>以該員



奏請陞補所有巴燕戎格通判一缺地處沿邊綿長  
數百餘里生番撒拉爾交錯而居彈壓撫綏甚關  
緊要且時有委辦番地事務非初選人員所能勝  
任經臣與藩臬兩司熟商遴選現在通判內祇有  
委用試用兩項人員而委用通判張萬年人地不  
甚相宜惟查有試用通判孫嘉楹河南監生捐納  
通判加捐分發籤掣甘肅該員辦事細心老成可  
信在廿四年委署地方均能妥協邊地情形亦俱  
熟習以之請署巴燕戎格通判實堪勝任惟以試  
用人員請補病故所遺選缺與例稍有未符但自

辦理番案以來該處情形已非昔比似應量爲變  
通茲臣不敢拘執成例貽悞地方謹遵人地相需  
之例專摺奏懇

聖恩俯念邊缺需員准以孫嘉楹署理巴燕戎格通判  
實與番回要地可期得力謹

奏

道光五年七月初十日奉

上諭那彥成奏揀員署番地通判一摺著照所請甘肅  
巴燕戎格通判准其以孫嘉楹署理仍照例試看期  
滿另請實授該部知道

道光五年七月十九日

奏爲要缺知州需員懇

恩俯准陞補以重地方事竊照涇州直隸州知州李焜  
因病出缺所遺涇州一缺爲入甘首站地當孔道  
政務殷繁非精明諳練之員難期勝任臣與藩臬

兩司逐加遴選查有寧夏縣知縣袁作翰浙江廩  
貢選授孝豐縣教諭加捐知縣卽用選授寧朔縣  
知縣調補寧夏縣知縣道光四年補行三年

大計卓異保薦奉

旨准其卓異加一級仍註冊回任候陞欽此該員老成

練達辦事明幹現署涇州篆務辦理一切均屬裕  
如且歷俸已滿年限又係卓異應陞之員以之陞  
補涇州直隸州知州實堪勝任惟查有地丁未完  
處分與例稍有未符合無仰懇

聖恩俯念衝途要缺乏員調補准以寧夏縣知縣袁作  
翰陞補涇州直隸州知州實於地方有裨謹

奏

道光五年八月初五日奉

上諭那彥成奏遴員陞補要缺直隸州知州一摺著照  
所請甘肅涇州直隸州知州員缺准其以寧夏縣知

縣袁作翰陞補該部知道

糾彈庸劣

道光二年十月二十八日

奏爲察看總兵年老請

旨原品休致並才未開展不勝南山重任之總兵奏請

調補以肅營伍而重地方事竊

臣前奉

恩旨署理陝西巡撫印務卽留心察看營員嗣復奉

命署理陝甘總督於接見各鎮將時亦將其年力才具

悉心詳誌查現任肅州鎮總兵李廷臣由行伍出

身履歷現開六十七歲熟悉營務人亦明白惟查

該鎮自乾隆三十二年在原籍四川入伍迄今五

硃

十六年實己年逾七旬步履雖尚強健精神究屬  
專關重任豈可聽此年老之人總職地雖有軍功  
衰頹專閫重寄未便任其戀棧致有貽悞惟該員  
國家原有恩典以養餘年所奏甚是  
曾經出師受傷屢著勞績合無仰懇

朕看此人原

硃

天恩准其原品休致又陝西漢中鎮總兵劉瑞武進士

是一詳飭欠村否必應調簡

出身現年五十七歲屢次出師征剿黔楚逆苗川  
楚三省教匪身受鎗石多傷本年正月間奉

旨補授西安鎮總兵經陞任督臣長齡

奏准調補今職查該鎮屢著勞績熟諳操防雖年近  
六旬精力未爲衰憊惟漢中鎮管轄南山一帶界  
連川楚查奸緝匪必須精明強幹而又熟悉地方

情形之員方克勝任劉瑞才具未能開展竊恐人地不甚相宜肅州鎮事務較簡可否仰祈

天恩以劉瑞調補肅州鎮總兵則劉瑞既克勝任而南山重地亦不致辦理踧蹙所遺漢中鎮總兵一缺應請

旨另行簡放至李廷臣出師黔楚川陝亦曾受傷著有微勞可否給予全俸以養餘年之處出自

天恩其餘各鎮將容臣悉心分別再行具奏謹

奏

道光二年十月二十八日



奏查漢中地處南山木箱紙廠爲游民聚集之所最  
易滋生事端又與四川接壤囑匪時常竄入山林  
密箐搜捕維艱總兵有彈壓督緝之責必須才具  
開展熟悉情形之員方克勝任查有潼關協副將  
呂天俸行伍出身現年四十八歲屢次出師征剿  
黔楚逆苗川楚三省教匪並於嘉慶十八九兩年  
內在河南陝西掃除逆匪蒙

恩賞給健勇巴圖魯名號該員曉暢營務明幹有爲歷任  
漁渡營都司遊擊寧陝營叅將在南山一帶十餘  
年之久於道路險阻土俗民情均能熟悉先後署

理漢中興安鎮象兵民悅服辦理俱能裕如若蒙  
皇上天恩俯准以呂天俸陞授漢中鎮總兵則該員益  
當感激圖報而臣亦可收人地相宜之效臣爲慎  
重地方起見與提臣楊遇春往返札商意見相同  
謹附片具奏謹

奏奉

硃批呂天俸原係朕欲擢用之員所奏深合朕意

道光二年十一月十七日奉

上諭那彥成奏總兵年老懇請休致並調補總兵一摺  
甘肅肅州鎮總兵李廷臣年老衰頹豈可復膺專閫

重任著以原品休致該員曾經出師受傷著有勞績  
加恩賞給全俸以養餘年陝西漢中鎮總兵劉瑞著  
調補肅州鎮總兵其所遺員缺著呂天俸補授該部  
知道

道光二年十一月二十四日

奏為特參才具平庸玩視要案之道員請

旨交部嚴議以重地方事竊臣自抵西寧查辦番案深  
知野番實不敢有意搶掠官馬抗拒官兵且聚集  
亦不能有數百人之多是必漢奸從中煽引勾結  
其勢方衆惟以未得眼線無從悉其姓名巢窟匪

月以來派員四出偵訪始知麻木溝盧生得等數犯實爲盜魁就獲之後連日熬審供出夥犯多名雖辦理漢奸少有要領而訪查業已經旬累月各夥盜勢必聞風遠竄難於搜捕無遺臣風聞本年

七月二十間卽有肅州回民田全在安肅道瑞林衙門呈控麻木溝等十餘人在野牛溝偷挖金沙身穿番衣番帽攔路截奪等情乃該道並不深究視爲尋常控案亦未稟知總督衙門僅批肅州嚴拏究辦又不卽會營查拏經臣劄查始據該道稟報現經拏獲被告馬五等七犯堅供素不爲匪及

提田全質對則又出口無踪現將馬五等發州管  
押等情查田全呈控各犯之時正各屬搶案衆多  
之日如果該道接收呈詞卽令田全作眼會營選  
役嚴密查緝何難儘數成擒或稟知總督臣亦必  
專員查拏從此根究當可早破巨案不致遲逾數  
月之久乃該道於此等事體並不斟酌輕重僅批  
該州嚴緝寥寥數言自謂畢事迄今雖拏獲數犯  
而原告又不知所往若非臣自行訪聞則馬五等  
犯又不過暫時看守迨爲日既久卽以原告不到  
照例銷案縱惡養奸庸劣實甚且查該道才具平

庸前在鞏秦階道任內辦理卽行竭蹶本不勝繁  
缺道員之任茲復玩視要案實未便再事姑息以  
何惜之有致貽悞地方相應請

旨將安肅道瑞林交部嚴加議處

臣

一面先將該道撤

任聽候部議一面劄委平慶涇道劉滢前往署理  
安肅道印務至劉滢所遺之平慶涇道卽令平涼  
府知府觀恒就近兼護至所遺安肅道係請

旨之缺仍懇

皇上天恩迅賜簡放以重職守謹

奏

道光二年十二月初七日奉

上諭那彥成奏叅才具平庸之道員請交部嚴議一摺  
甘肅安肅道瑞林於回民田全呈控麻木溝等偷挖  
金砂一案並未稟知該督又不卽時會營查拏遲逾  
數月之久以致巨案未能早結此等疲玩不職之員  
斷難姑容瑞林著先行開缺交部嚴加議處

道光三年六月初十日

奏爲特叅闕冗不職之知縣及引放渠水辦理不善  
之同知恭摺奏

聞事竊臣於五月初間出口審辦案件道經平羅縣地

方據沿途農民紛紛呈訴伊等所種田畝全賴渠水澆灌現已節屆芒種渠水尙未引放到梢地方官不爲設法辦理懇請飭催等情臣查寧夏府屬之寧夏寧朔平羅三縣田畝均附近黃河舊有漢唐及

大清惠農等渠向於立夏後黃河水長由水利同知監看引放河水入渠自渠口直達渠梢各該管知縣俱例應親身上渠並由寧夏道派委佐禠等官分段稽查督率農民俵分以資均勻灌溉本年立夏後黃流長發較歷年遲逾十餘日該同知張東



序引水入渠各渠綿長二三百里不等寧夏寧朔  
兩縣地居上游往往吏胥私行賣放或刁惡生監  
壟斷以致逐段截流澆灌布種之餘任意洩留而  
平羅縣地居下游渠水未能同時到梢田畝不及  
普種該民人等紛紛呈報而平羅縣知縣張培並  
未一字稟聞其爲漫不經心已可概見臣接見該  
員心地糊塗詢以地方事件甚不明白訪查官聲  
亦不洽輿情現在急需引水補種晚秋該員人既  
闕冗斷難經理無悞未便因其尙無別項劣蹟稍  
事姑容應請

旨將平羅縣知縣張培勒令休致當卽另委鹽捕通判查寶勤暫行接辦務先上緊設法速致渠水達梢俾得亟早補種一面飭行兩司公同遴選能事合例之員詳請

題補以重地方至水利同知張東序本係專司自應嚴行叅處惟各該渠身綿長一二百里二三百里不等一人耳目一時難周其情尙有可原應請將該同知張東序摘去頂戴責令會同接署之新任平羅縣趕緊設法辦理如果無悞再行斟酌

奏請開復並將該管道府分別記過稍示薄懲倘再

有遲悞定卽一併嚴行叅辦一面另委熟悉情形  
之文武各員明白查勘各渠情形務期妥善辦理  
以資永久利濟謹

奏

道光三年六月二十六日奉

旨這所叅闕冗不職之甘肅平羅縣知縣張培著勒令  
休致其引放渠水辦理不善之寧夏府水利同知張  
東序著摘去頂戴責令會同署平羅縣趕緊設法辦  
理如果無悞再行奏請開復倘仍遲悞著卽嚴叅懲  
辦

道光三年八月十四日

奏爲調任叅將年力就衰請

旨勒令休致以肅營伍事竊

臣上年奉

命來甘查辦西寧番案因江西寧都營叅將邵能曾於

嘉慶十二年跟隨

臣

辦理番案熟知口外路徑兼

通番語當經奏懇

天恩將邵能調赴甘省俾資委用欽奉

上諭江西寧都營叅將邵能著該督於甘肅叅將中酌

量一員對調欽此復經

臣

查有陽平關營叅將林向

榮堪與邵能對缺調補奏奉

祿批知道了欽此茲該叅將邵能已經到甘查西寧野  
番回巢已久仰賴

皇上天威將屆一年番子不敢過河搶劫蒙古俱皆安  
堵所辦善後事宜亦已完竣臣方擬將邵能奏調  
西寧番地要缺以後之撫輯彈壓正資得力且曾  
屢次出征受傷著績乃連日接見數次詢知邵能  
現年六十四歲步履踉蹌眼目昏曠年力實已就  
衰臣未敢因邵能係專摺奏調之員稍事迴護姑  
容致有貽悞相應據實

奏明請

旨將調補陽平關叅將邵能原品休致以肅營伍謹

奏

道光三年八月二十九日奉

上諭那彥成奏甄別調任叅將請旨勒令休致一摺甘肅調補陽平關叅將邵能年力就衰著以原品休致該部知道

道光三年九月十七日

奏爲甄別衰庸不職人員請

旨降革勒休以肅吏治事竊惟設官分職各有責成道府有監司表率之衡州縣有社稷人民之寄矧甘

肅地瘠民貧番回襍處尤須廉能之員加意教養  
而臣上年秋間奉

命來甘署理總督篆務旋復蒙

恩實授其時駐紮西寧通省官員賢否未能週知迨今

春回蘭各屬有因公來省稟謁者有因公出省閱

兵沿途接見者逐一留心察其才具核其所辦公

事其間或格外出力才守兼長廉能可靠之員俟

容臣遇事聲明具奏其不堪職守者亟應據實叅

核以重地方茲查有寧夏道宜清安寧夏水利是

該道專責因該道才具平庸不能督率委員辦理

妥善以致下游之平羅縣屢年不得水利紛紛呈

訴臣復行查勘洵屬實情惟其人尙謹飭操守尙

好請降爲簡缺知府留甘候補平涼府知府觀恒

衰庸患病平涼縣知縣趙質彬年老衰憊均難望

其振作該二員均請勒令休致貴德同知周廷芬

上年原因該員熟悉番情辦事勇往經臣由西寧

縣特保陞任貴德同知詎該員意存高興任意辦

公且聲名亦屬平常臣不敢因保舉在先少事迴

護致滋貽悞應請革職仍行訪查倘有贓私實據

再當參奏從重治罪所有宣夏道平涼府知府二



卷二十一  
缺請

旨卽行

簡放以便接印辦事貴德同知容臣另行揀員奏補謹  
奏

道光三年十月初二日奉

上諭那彥成奏甄別衰庸不職各員一摺甘肅寧夏道  
宜清安才具平庸惟人尙謹飭操守尙好著降爲簡  
缺知府留甘候補平涼府知府觀恒衰庸患病平涼  
縣知縣趙質彬年老衰憊均著勒令休致貴德同知  
周廷芬因保奏陞任意存高興聲名亦屬平常著卽

革職該部知道

道光四年十一月初十日

奏爲考驗應補都司之世職人員難期勝任另請揀  
補以重營伍事竊照本年九月間接准部咨甘肅  
破口營都司馬天錫掣補西安鎮標左營遊擊所  
遺員缺應用世職騎都尉人員行令揀選題補隨  
查破口營都司一缺設處甘州府屬地方兼轄定  
羌廟汛雖非要缺係屬專營別無文武同城可以  
共相商辦且都司爲一營表率職分較大非干把  
微弁可比現在候補都司之騎都尉世職僅有韓

衍琦寶光保二員其平日循分學習臣本所素悉  
但現在將予都司寶缺尤應周詳選擇以裨營伍  
當經檄調來省悉心考驗得該世職韓衍琦現年  
三十二歲年力雖強然弓馬平常於訓練兵丁難  
期得力至寶光保人才弓馬較好惟年甫二十五  
歲歷練欠深畀以專營恐難勝任以上二員經臣  
再三酌核若竟循例請補終覺不甚相宜竊思該  
世職等祖父捐軀

國事固應延賞後人第伊等仰沐

厚恩每年例支四品恩俸爲數較優已非別項候補人

員可比卽便稍遲補缺亦不致於賠墊自宜令其  
暫爲留營再加教練且俟下屆輪用到班再行酌  
量請補所遺硤口營都司一缺應否仍由臣於別  
項人員內另揀題補之處臣未敢擅便伏候

訓示祇遵臣爲慎重營伍不敢拘泥成例恐滋貽悞謹  
奏

道光四年十一月二十七日奉

上諭那彥成奏請揀補都司一摺甘肅硤口營都司例  
應於世職人員內揀補茲據該督查明騎都尉世職  
僅有韓衍琦寶光保二員均難勝任應暫行留營教

練所有甘肅硤口營都司著往其於別項人員內揀  
選題補該部知道

道光五年七月十九日

奏爲甄別衰庸才不勝任人員請

旨降補勒休以肅吏治事竊照州縣佐貳各官皆有地  
方之責得一賢員卽民受其福若非時刻留心查  
覈則衰庸迂執之員任聽濫竽必滋貽悞臣去歲  
甄別各員業已奏蒙

聖鑒分別降休在案茲復留心考察查有新陞階州西  
固州同李焯前因該員辦事勇往人尙樸實經臣

由俸滿州判

奏陞西固州同尚未引

見到任詎該員近來委署地方於委辦一切案件例案不熟不知細心研求屢經舛錯竊忽查西固州同係分防佐貳要缺時有聽斷事件臣不敢因保舉

在先稍存迴護貽悞地方惟該員平日尙無別項劣蹟應請仍以州判原官酌量補用又合水縣知縣鄧肇繹才識迂拘辦事竭蹶難勝民社應請降爲佐雜歸部另選候補通判張萬年久病衰頹難期振作應請勒令休致臣與濟臬兩司面商相同

現據具詳前來相應請

旨將該員等分別降休以肅吏治謹

奏

道光五年八月初五日奉

上諭那彥成奏請將衰庸才不勝任人員分別降補勒  
休一摺甘肅階州西固州同李炤審辦案件屢經舛  
錯惟該員平日尙無劣蹟著仍以州判原官酌量補  
用合水縣知縣鄧肇繹辦事竭蹶難勝民社著降爲  
佐襍歸部另選候補通判張萬年久病衰頹難期振  
作者卽勒令休致該部知道

那文毅公三任陝甘總督奏議卷六十一